

तांत्रिक मनक सिधपीठः छिनमसता मंदिर

डा० भुनेश्वर अनुज

रॉची आउर हजारीबाग जिला कर सीमान ठिन आहे बन-पहाडी कर सुन्दर ठाँव। ठाँव कर नाँव हेके राजरपा। राजरपा में छिनमसता देवी कर सुन्दर मंदिर आहे। बन आउर पहाड़ कर आगा में ई मंदिर आहे। चाइरो बट ले बन-पहाड़ कर पचरी आहे। आउर एहे ठिन गोटेक सुन्दर घाघ (जलप्रपात) बइन जाय हे। ई घाघ कर ऊँचाई 60 फीट आहे।

ई मंदिर हजारीबाग सहर से 50 मील दूर उत्तर दने आउर रामगढ़ से 23 मील उत्तर-पुरुब दिसा में रामगढ़-गोला डहर में आहे। मंदिर जग पोहँचेक ले 15 मील पका सड़क आउर 8 मील काचा गुडगुड़ डिसाल डहर आहे। जेकर देखभाल राझ सरकार करेला। हजारीबाग आउर रॉची से राज्य परिवहन कर गाडीमन राजरपा तक जायला आउर रामगढ़ से छोटो गाडी मन भेटाय जायला। गोला डहर में रेल टिसन आहे जे बुडकाकाना-हाबडा रेल-डहर में पडेला। गोला डहर में रेलगाडी से उतझर के टेकसी-बैलगाडी मन से मंदिर के दर्सन ले जाल जाय सकेला। डहर खराब होयेक चलते देखइया के बझरसा काल कर चाइर महिना भझर ऊ जग जायक महामस्किल होत रहे मुदा आब इसन बात नखे।

इतिहास- राजरपा मंदिर केर अस्थापना कर सुपट जानकारी नि भेटायला मुदा ई मंदिर डबले पुरना हेके। मंदिर कर बनाल ढंग देइख के अंदाज लाइग जायला कि ई मंदिर गुप्तकाल में बनाल जाय हे। एखन हाले में भेटाल अभिलेख मन से पता चइल हे कि जगत गुरु शंकराचार्य ई मंदिर में तीन राझत बिताय रहेय। एहे सबूत मन से ई सुपट कहल जाय सकेला कि ई मंदिर कर निरमान चउथा सताब्दी में भे रहे। ई ठाँव कर असली नाँव राजरप रहे आउर राजा-महाराजा मन एहे मंदिर में काया-कल्प कर अभ्यास करत रहेय। ई परम्परा रामगढ़ राजा विष्णु सिंह तक चललक। राजा विष्णु सिंह हियाँ काया-कल्प कर अभ्यास कइर रहेय आउर सिधि पाय रहेय।

चाहे जब आउर के हों बनुवाय होवे ई मंदिर के, ऊ ठाँव के चुनेक में आउर नक्सा बनुवायक में सूझ-बूझ कर काम कइर रहे। एतने नड़ ऊ सक्ति आउर तांत्रिक कर जबर भगत रहलक होइ। छिनमसता देवी कर तंत्रसार कर मोताबिक मंदिर कर निरमान सभे ठाँव में नी करल जाय सकेला। जे तिनकोनिया ठाँव होय आउर गोटेक नद एगो नदी संगे मिलेला, नदी कर पानी नद उपरे गिरेला औहे ठाँव ई मंदिर ले सुपट होय सकेला। गोटे भारत में राजरापाय गोटेक इसन ठाँव आहे जेठन नदी कर पानी नद उपरे गिरेला आउर इकर स्थिति तिनकोनिया बनेला।

देवी छिनमसता तांत्रिक - आब हामरे छिनमसता देवी आउर तांत्रिक सक्ति कर बारे में तनिक जानकारी कइर लेइ। छिनमसता कर माने का होयला? छिनमसता कर अविकल माने हय जे कर मुँड काइट देल हय। महाबिदया कर ई रकम कर रूप कर रहस का हेके? हामरे पुराण मन से इंकर बारे में जानीला कि एक परिया हिमालय पहाड़ में दक्ष नाँव कर राजा रहँय। जेकर अनइते सुन्दर बेटी रहँय जेकर नाँव रहे 'सती'। जब सती सेयान होलक कहेक माने बिहा देक नियर होलक तब राजा दक्ष स्वयंवर रचलँय। जेकर में शिव एकाइर दनै बइठल रहँय। सती सभे देवता आउर राजा मन के पार कइर के शिवजी कर नजिक आलँय। आपन बरमाला के शिव कर घेंचा में ऊ पिंधाय देलँय। सती कर इसन काम से दक्षे भइर के दुख नी भेलक मुदा सभे देवता आउर राजाव मन खिसाय गेलँय आउर शिवजी कर आलोचना करेक लागलँय। राजा दक्ष थोरेक दिन बाद एगो यज्ञ कर इंतजाम करलँय जेकर में सभे के नेवता देल गेलक। मुदा शिवजी आउर सती के नेवता नी देलँय। शिवजी हेगर नेवता पाले जायक नी खोजत रहँय मुदा सती जायक खोजत रहँय। आखिर में सती आपन बाप (दक्ष) कर यज्ञ में भाग लेक ले दस बिदिया कर रूप धइर लेलँय। दस में एक झन छिनमसताव रहे। ई चलते शिवजी मुसइक देलँय आउर जायक कर हुकुम दे देलँय। यज्ञ में सती देखलँय कि सब देवता ले आसन बनल आहे मुदा शिवजी कर नड़। सेकर से सती अनइत खिसाय गेलँय आउर आपनेहें के खतमे कइर देक कर निरनय करलँय। सती कर सिरायक कर खबर जब

शिवजी के भेटालक तब ऊ यज्ञ ठाँव में पोहँइच गेत्य आउर सती कर लाश के खांध में लाइद के तांडव नाच नाचेक सुरु कइर देलँय। पृथ्यी कर रक्षा खातिर भगवान विष्णु यज्ञ ठाँव में आलँय आउर आपन सुदर्शन चक्र से सती कर लाश के काइट देलँय, जे जहाँ-तहाँ जाय गिरलक। आउर एहे लखे दस महाबिदया में छिनमसता कर गोटेक रूप कर निरमान भेलक। बाकी आंउर नव महाबिदया हँय - काली, तारा, षोडशी, भुवनेश्वरी, भगवती, बागला, मातंगी, भैरवी आउर कमला।

महातम - जब मनुख कर पूरा काया रहेला तब हामरे काम कर दास होवीला। से ले हामरे ई देवी कर गोड तरे पावीला-कामदेव आउर सती के। हामरे मन इच्छा कर दास हेकी आउर हामरे में अनठेकान लालसा आहे। हामरे आपन जरुरत के पुरायक ले बेगिनाती नइतिक आउर अनइतिक काम कइर बझीला। सेहे ले मनुख कर मन बेचइन रहेला। देवी कर मुँड कटाल रूप, मन कर बेहिसाब बेचइनी कर प्रतीक हेके। देवी कर लेंगा आउर भतखइया करे दखीनी आउर बरनीनी आहैय जेकर ले हमरे उपाय करीला सेके अंकित करेला। कटाल मुँड के तीन बूंद लहूवे से गोटेक दखीनी, दोसर बरनीनी आउर तीसर देवी आपनेहें लेलँय। ई संकेत करेला कि हामरे खाली आपन ले भझर नइ मुदा दोसरोहों ले महत्त्वाकांक्षी होवीला।

केउ-केउ भक्तमन ई कटल मुँड के एकदमे तेयाइग कर प्रतीक मानयेंना। सउब से जबर शक्तियो आपन पहचान ले बळ्का से बळ्का तेयाग कइर सकेला। हामरे मनुखो मन ले जबर तेयाइग कर दरकार आहे। जेकर से स्वावलम्बी बझन के रझेह सकब।

दस महाबिदया रूप - दक्ष कर यज्ञ में सती से देखाल जाय रहे एकक रूप ई बतायला कि का नियर दक्ष याने कुकरमी सउब के छितिछान कइर देला आउर सभे केउ शक्ति में आपने के हिफाजत देख्येंना। देवी छिनमसतोव एहे मझधका जबर शक्ति हेकँय।

छिनमसता मंदिर केर देवी कर पूजा आउर सेवा सउब दिन बिदवान पूजारीमन से करल जायला। संगे-संग हिंया दुर्गापूजा, कालीपूजा आउर पूस संक्रांतियो में पूजा होयला। ई मंदिर आउर देवी कर दर्शन लागिन

ऋग्वेद

सालो भइर भक्तमन आते रहयँना। मंगर आउर सनिचर कर दिन हियां बगरा भीड़ होयला। हियां आपन साध पूरा करेक ले दूर-दूर से भक्तमन आवयँना। इसन देखल जायला कि जे भक्त देवी कर पूरा भक्ति देखाय हे आउर पूजा कइर हे उकर साध पूरा होय हे। कठिन आउर बेचइनी कर हालइत में जदि इनकर दर्सन करल जाय तो पूरा सांति भेंटायला।

दर्शनीय ठाँव - अदमीमन पिकनिक मनायक ले, सुन्दर दृश्य देखे ले अकटूबर से मार्च महिना तक आवयँना। आउर भक्तोमन ले ई अनइते महातम राखेला। बइरसा में देखइया आउर भक्तमन के आयक-जायक कर सुविधा नी होयक चाड़े भारी मोसिबत उठायक पड़ड़ जायला। बइरसा दिने भेड़ा नद जे दोमोदर नदी में गिरेला सेकर से बाझड़ आय जायला। जेकर से ~~जिर~~ भक्त मन के मंदिर तक पोहँचक में मसकिल होय जायला। तीन फीट कॉज वे (पूल) भेड़ा नदी में बनायक एकदम दरकार आहे आउर तभे मंदिर तक जाल जाय सकेला। मुदा आब दोसर दन से मंदिर तक उहर बनाय देल जाहे।

देवघर, वासुकीनाथ, राजगृह, पारसनाथ आउर बोधगया लखे हिंया देखइया कर सुविधा ले सरकार के एहो मंदिर कर बेवसथा करेक चाही। हुंडरु, नेतरहाट आउर गया में जे नियर विश्रामगार हय से हे नियर हिंयाव जनकार्य आउर बन विभाग बट ले निरमान कर काम होयक चाही। राँची, हजारीबाग आउर धनबाद से बगरा बसो कर बेवस्था करेक चाही।

बिजलियो कर बेवस्था होयक चाही आउर ई काम तो हियां अलगटे होय सकेला।

(नोट : एखन हिंया पानी-बीजली कर बेवस्था होय जाय हे आउर सड़क,

बसो कर सुविधा हय-)